



# KOPI PAHIT

*Hađrah* – iaitu ucapan-ucapan pujian kepada Nabi yang dilakukan sambil memalu rebana ialah suatu kebiasaan diadakan di dalam perkahwinan ataupun perayaan-perayaan untuk orang Islam terutamanya kalimah-kalimahnya dan syair-syairnya memuji Nabi. Maka oleh kerana itu ada orang bertanya adakah patut pujian-pujian untuk Nabi itu untuk dijadikan sambutan atas orang yang bukan Islam? Cemeti al-Farouk hanya garu kepala kerana ia teringat manusia-manusia itu kadang-kadang lupa daratan ya – tak?

\* \* \*

Ada ura-ura rumah Jamiyah hendak dirobohkan dan diganti atau didirikan di atasnya Dewan al-Malik Faisal kerana al-Malik Faisal menderma 126 ribu ringgit untuk binaaan itu. Wang itu belum diserahkan. Kalaulah umpamanya dirobohkan – wang belum diberi kepada Jamiyah – hanya di tangan Konsul Agung kerajaan Saudi dan peribadi yang memegang sudah... Mudah-mudahan jangan – tentunya Setiausaha Jamiyah terpaksa mendirikan pondok di tengah-tengah bangunan itu menunggu-nunggu *laylah al-Qadr* dari lain – apakah tidak mungkin terjadi?

\* \* \*

En. Khir Johari dikatakan telah menunjukkan kepada wanita Filipina bagaimana membela manggis. Nampaknya di dalam gambaranya mudah. – Boleh jadi

manggisnya lembut. Kalau manggis keras, bagaimana?

\* \* \*

Puan Hasanah Ahmad (Perikatan Plentong) telah menganjurkan kepada kerajaan Johor supaya dari semasa ke semasa memberi ceramah Islam kepada pelayan-pelayan wanita di negeri Johor. Siapa yang disuruh berceramah itu ustazkah atau ustazahkah! Kalau ustaz – baik-baik sebab pelayan biasa dan tahu melayan. Baik-baik ustaz jangan hanyut!

\* \* \*

Timbalan Perdana Menteri Malaysia, Tun Abdul Razak, selaku Yang Dipertua Majlis Sukan telah menasihati ahli-ahli sukan Malaysia yang berangkat supaya menjaga nama baik Malaysia dalam lapangan sukan antarabangsa. Pesan Tun itu kurang, patut ditambah, jaga akhlak dan kelakuan supaya lebih bersemarak lagi.

\* \* \*

Di Bombay kemarau menjadi-jadi. Semua orang memohon limpah kurnia Tuhan untuk menurunkan hujan. Limpah kurnia Tuhan, tidak lama antara, turun melimpah-limpah tidak terkira. Akhirnya negeri bah, tanaman-tanaman rosak. Begitulah “kurnia” Allah kepada manusia – sedikit salah banyak salah – *lā ḥawla wa lā quwwata illā billāh*.

\* \* \*

Tengku Abdul Rahman memperingatkan supaya jangan bermain politik seperti monyet – garu sana dan kerisik sini – lompat sana dan sini. Bagi yang jujur Tengku tentunya menerima nasihat itu tetapi yang mahu nama atau mahu dikenal kalau tidak berdasar seperti monyet tentu tidak akan jadi terkenal!

\* \* \*

Hakikatnya slogan ‘*Malaysian Malaysia*’ yang diribut-ributkan dahulu di Singapura menurut Tun Abdul Razak, ialah satu topeng pukauman<sup>1</sup> ... Perjuangan *Malaysian Malaysia* itu sebenarnya ialah perjuangan Melayu UMNO dan orang-orang Melayu. – Tak payah ulaslah...

\* \* \*

Tuan Seenivasagam telah menelah Tun Abdul Razak akan memegang jawatan Perdana Menteri sebelum hujung tahun ini. Ini disebutnya di dalam Majlis Mesyuarat Negeri Perak untuk mengucapkan terima kasih kepada usaha-usaha Tun Abdul Razak menamatkan Konfrontasi. Apakah Tuan Seenivasagam sudah ada mencium bau Tengku hendak letak jawatan? Entahlah!

\* \* \*

Orang-orang Indian Muslim, tatkala mengadakan majlis al-Qur’ān di Town Hall, Singapura telah menghadiahkan sebuah Qur’ān bertulisan Arab dan Inggeris kepada Perdana Menteri Lee Kuan Yew. Orang-orang Islam banyak tertanya-tanya bagaimana? Ya bagaimana firman Allah yang maksudnya: Janganlah menyentuh mushaf melainkan orang yang suci. Suci bagaimana? Ya, suci mengikut Islam.

Cemeti al-Farouk.

<sup>1</sup> Perkataan sebenar ialah perkauman.